

Թեև այս խօսքերը Մարօն արտասանեց խիստ պիկոյ համոզմունքով, այստամենայնիւ ես չէի կարողանում հաւատացնել ինձ, թէ մի զառամեալ անապատական արեղայ կարող էր Ասլանը լինել: Բայց Մարօն հաստատեց իր խօսքը մի ուրիշ փաստով, որ շատ հաւանական էր: Նա յիշեցրուց ինձ այն նկատողութիւնը, որ արել էր նա, երբ առաջին անգամ տեսաւ պառաւ կախարդին եւ փոքրիկ Յիւրբիին, որ նստած ժայռի վրայ, ուխտաւորների համար գուշակում էր: Նա այն ժամանակ ասաց. «Կարօն կամ նրա ընկերներից մէկը պետք է այստեղ լինի»: Եւ աւելացրեց, թէ «Այն պառաւն իսկոյն յայտնուում է այնտեղ, ուր նրանք լինում են»: Եւ ես այնօր միթէ չէի՞ տեսել միեւնոյնը, երբ «Կաթնաղբիւրի» ձորում ծպտեալ արեղան միացաւ պառաւ կախարդի հետ եւ համբուրեց Յիւրբիին:

Իմ տարակոյսը փարատուած էր. ես յօժարոտեցայ գնալ եւ գտնել «ճգնաւորին», բայց մտածում էի մեր վրանը անտեր եւ առանց տղամարդի չթողնել: Երբ այդ մասին յայտնեցի Մարօին, նա պատասխանեց.

– Սուրբ աստուածածինը իր ուխտաւորներին կպահէ, գնա՛ նք:

Ես չհամոզուեցայ: Նա խնդրեց ինձ փոքր-ինչ դրսում սպասել, իսկ ինքը մտաւ վրանի ներսը: Մինչեւ նրա դուրս գալը, ես գտայ վանքի գիւղացիներից մէկին, եւ նրան մի քանի ղուրուշ տալով, պատուիրեցի հսկել վրանին մինչեւ մեր վերադարձը:

Քանի թոպէից յետոյ դուրս եկաւ Մարօն. ես հագիւ կարողացայ ճանաչել նրան. նա փաթաթած էր մի լայն վանայ արայի (վերարկոյ) մէջ եւ գլխին քրդի ձեւով ապարօշ էր կապել:

– Դա ո՞վ է, – հարցրուց նա, տեսնելով գիւղացուն:

– Ես պատուիրեցի նրան հսկել վրանին մինչեւ մեր վերադարձը:

– Խաթունը արթուն է: Լաւ, գնանք:

Երբ փոքր-ինչ հեռացանք, նա ասաց.

– Դու չես իմանում, Ֆարիատ, նա ինքը կը գողանայ: Այստեղ բոլորն էլ աւազակներ են:

– Վանքի սպասաւորն երկիւղած կը լինի, – պատասխանեցի ես:

– Չէ՛, այդպէս չէ, ես իմ աչքով տեսայ, ինչպէս մի վարդապետ գողացաւ եւ գրպանը դրեց իմ գցած գանձանակը: Նրանք մեզ խաբում են, Ֆարիատ, նրանք այն չեն, որպէս դրսից երեւում են... հայրս շատ է պատմել ինձ նրանց գործերի մասին...

– Զո վերարկոյ տակից զէնքի ձայն է լսւում, Մարօ: